



Publicaziuns dalla vischnaunca, jamna 2

Damonda da baghegiar

Nr. 2011-1001

Datum da publicaziun: 14 da schaner 2011

Il patrun: Sep Antoni Schuoler-Flepp, Via Clavaniev 12, 7180 Disentis/Mustér

Il representant: Sep Antoni Schuoler-Flepp, Via Clavaniev 12, 7180 Disentis/Mustér

Object: Sanar las preits dil nuegl, endrizzar en clavau ina part ualer ed adattar igl access (via) tiel baghetg, parcella 2796, Val Dadens (Planatsch), 7180 Disentis/Mustér

Nr. 2011-1003

Datum da publicaziun: 14 da schaner 2011

La patruna: Heidi Deplazes, Via dils Larischs 8, 7180 Disentis/Mustér

Il representant: Maissen architectura ed immobiglias SA, Via Alpsu 8, 7180 Disentis/Mustér

Object: Nova entrada cun scala el liber, midada dalla fatschada sid-vest e habitaziun nova el tretetg, parcella 2298, Via dils Larischs 8, 7180 Disentis/Mustér

Ils plans da construcziun ein deponi tier l'administraziun communal.

L'investa publica cuoza 20 dis dapi il datum dalla publicaziun.

Eventualas protestas encunter sura damonda da baghegiar ein d'inoltrar a scret enteifer 20 dis alla istanza da baghegiar, caum postal 57, 7180 Disentis/ Mustér. La protesta sto esser motivada e sut-tascretta dil recurrent ni da siu representant.

Disentis/Mustér, ils 11-1-2011

Uffeci da baghegiar Disentis/Mustér

Lubientschas da baghegiar

L'istanza da baghegiar ha concediu las suandontas lubientschas da baghegiar:

Nr. 2010-1051

Patrizia Cabernard-Huonder, Via Peisel 2, 7186 Segnas; midada d'intent, parcella 2953, Plaun Menisch, 7186 Segnas.

Nr. 2010-1052

Patrizia Cabernard-Huonder, Via Peisel 2, 7186 Segnas; midada d'intent, parcella 2665, Plaunca Su, 7180 Disentis/Mustér.

Nr. 2010-1055

Wendelin Jacomet-Di Nolfi, Via Sogn Valentin 22, 7183 Mumpé Medel; baghetg annex vid la casa da habitar, parcella 1078, Via Sogn Valentin 22, 7183 Mumpé Medel.

Quellas lubientschas san vegnir contestadas enteifer 30 dis dapi la publicaziun el Fegl uffical dalla Surselva tier la Dertgira administrativa dil cantun Grischun.

Disentis/Mustér, ils 10-1-2011

Uffeci da baghegiar Disentis/Mustér

Cussegl da vischnaunca da Mustér *In perschuadiu gie alla Oвра electrica Russein*

En sia seduta extraordinaria dils 7 da schaner 2011 ha il cussegl da vischnaunca approbau unanimamein e senza cuntervuschs il project Oвра electrica Russein per mauns dalla votaziun dil pievel dils 13 da fevrer 2011. La muntada da quella fatschenta ei vegnida documentada entras la preschientscha da varga 80 vischinas e vischins. La tschentada ei vegnida tgamunada dalla nova presidenta dil parlament communal, Rita Huonder-Tenner.



Il president communal, *Dumeni Columberg* ed il meinaproject, insch. Michael Bätcher dall'Axpo han dau ina orientaziun fetg detagliada da quella fatschenta da zungronda muntada per la vischnaunca da Mustér.

L'Ovra electrica Russein ei vegnida erigida ils onns 1946/47 dalla Patvag Kraftwerke AG. La concessiun scada ils 30 da zercladur 2027. La proprietaria, oz l'Axpo Hydro Surselva AG, las duas vischnauncas da concessiun da Mustér e Sumvitg ed il cantun Grischun ein secunvegna d'instradar gia ussa ina concessiun anticipada.

El decours dils dus davos onns ha in consorzi, che secumpona dallas duas vischnauncas e dalla Axpo, preprau la documentaziun per l'engrondaziun dall'ovra Russein. Miez december 2010 ha el suttamess allas vischnauncas la damonda per la scadenza avon temps dalla concessiun existenta e per ina nova concessiun. Las suprastonzas communalas da Mustér e Sumvitg han tractau la damonda da cuminonza e presentan ella al cussegl da vischnaunca da Mustér respectivamein alla radunonza communal da Sumvitg per mauns dalla votaziun dil pievel.

En ina discussiun animada e fetg constructiva ha il cussegl da vischnaunca dilucidau differents aspects dalla quella impurtonta ovra. El considerescha quei project sco ina schanza unica per la vischnaunca e sustegn cun perschasiun las proprostas presentadas. Cun quella ovra san las entradas annualas vegnir augmentadas da rodund 73 000 a 400 000 francs. Cun l'indemnisaziun per il retuorn a tschep sa la vischnaunca separticipar cun 15 procent alla nova societad ed ei resta aunc varga dus milliuns francs per investiziuns prudentas sil sector dall'energia.

Alla fin dalla debatta ha il cussegl da vischnaunca approbau unanimamein las proprostas dallas suprastonzas communalas per mauns dalla votaziun dil pievel, numnadamein d'approbar il retuorn a tschep avon temps e l'indemnisaziun persuerter, la nova concessiun dil dretg dallas auas al consorzi da studi Russein sco era la participaziun dalla vischnaunca da 15% alla nova societad Ovra electrica Russein SA.

Per evitar divergenzas davart las cumpetenzas, ei la suprastonza communal vegnida plenipotenziada d'exequir tuttas disposiziuns necessarias per realisar quels conclus. En quei connex ha il president communal saviu comunicar, che la vischnaunca ha cumprau ils suloms da bunamein 12 000 m² a Pignola. Il plan da quartier vegn publicaus proximamein.

Plinavon duein las entradas unicas e nunprevedidas dil retuorn a tschep vegnir impundidas per investiziuns specialas cun ina valur cuzzonta, en emprema lingia per la participaziun alla nova societad Ovra electrica Russein SA e la summa restonta per projects ed ovras hidraulicas sco era per mesiras sil camp dall'energia regenerabla.

Informaziuns supplementaras

Naven da gievgia, ils 27 da schaner 2011 ein la documentaziun dil project sco era ils contracts exponi en ina stanza en casa communal. Interessents ein supplicai da s'annunziar duront las uras da biro al spurtegl. Plinavon stat il president communal a dispoziun per informaziuns **gievgia, ils 27 da schaner e gliendisdis, ils 7 da fevver 2011 mintgamai dallas 16.00 entochen allas 18.30**. Interessents ein medemamein supplicai da s'annunziar al spurtegl.

Suprastonza communal

Sanaziun dalla via da rimnada

«Via Faltscharidas» – Communicaziun dalla clav da repartiziun dils cuosts approximativs

Ils 13 da december 2010 han ils conclus davart l'introducziun dalla procedura da perimeter e la fixaziun digl intschess da perimeter obteniu vigur legala. Ella seduta dils 12 da november 2010 ha il cussegl da vischnaunca concediu il credit necessari. Cun quei ch'ins ha buca fatg diever dil referendum facultativ, ei era quei conclus ius en vigur.

Sin fundament dils cuosts approximativs, dalla contribuziun communal ord il fondo Vivian (conclus dils 8-11-2010) e dils credits concedi sa vegnir cuntinuau cun la procedura. Tenor art. 25 OPT (ordinaziun davart la planisaziun dil territori dil cantun Grischun)eis ei da comunicar als pertuccai la



repartiziun dils cuosts. La tabella cun la clav da repartiziun dils cuosts approximativs sils proprietaris da terren sco era il plan cugl intschess da perimenter ein publicai naven dils 14 schaner 2011 en casa communal (stanza nr. 10). Encunter la clav da repartiziun dils cuosts approximativs sa, el senn dallas prescripziuns d'art. 25 OPT, vegnir protestau enteifer 30 dis dapi la publicaziun officiala alla supraztonza communal Mustér, caum postal 57, 7180 Disentis/Mustér. La protesta sto vegnir inoltrada a scret ed ei da motivar.

Disentis/Mustér, ils 10-1-2011
Suprastonza communal

Purschida gratuita

La vischnaunca da Mustér porscha a ses habitonts la pussevkladad da visitar gratuitamein la Casa da traffic a Lucerna, www.verkehrshaus.ch. Al spurtegl dall'administraziun communal sa per **mintga di** digl onn vegnir retratg **5 entradas gratuitas**.

En quella purschida ei cunteniu:

- entrada gratuita ella Casa da traffic a Lucerna cun museum, planetarium, museum da Hans Erni
- teater da film IMAX per in prezi special (frs. 4.– reducziun)
- 10% rabat sin artechels ella stizun dil museum

Co fuss ei da far inagada in'excursiun a Lucerna, forsa gest cun nezegiar la carta dil di per viagiari cun quasi tut ils mieds da traffic publics en Svizra? Dapli informaziuns retscheveis Vus tier l'administraziun communal Mustér (tel. 081 920 36 36 ni e-mail: admin@disentis.ch).

Nus giavischein ina nunemblideivla aventura el museum il pli frequentau en Svizra.
Suprastonza communal

Controlla da habitonts

Mortori

Patrizia Hawelski, naschida ils 12-7-1963, morta ils 1-1-2011.

Vischinadi Mompé-Medel - Radunonza generala

Sonda, ils 29 da schaner 2011 allas 20.15 el local dalla stalla dad Armin Manetsch.

Tractandas:

1. Beinvegner
2. Elecziun d'in dumbravuschs
3. Prelecziun ed approvaziun dil protocol
4. Rapport dil president
5. a) Rapport dil cassier
b) Rapport dils revisurs
6. Elecziuns
7. Structura futur dil vischinadi Mompé-Medel
8. Lavur cumina
9. Varia

Cordialmein envida
La suprastonza



**Vischinadi Vitg Mustér - Invit alla radunonza generala
Mesjamna, ils 26 da schaner 2011 allas 20.00 ella Furca.**

Tractandas:

1. Beinvegni
2. Elecziun diils dumbravuschs
3. Prelecziun dil protocol
4. Rendaquen e rapport diils revisurs
5. Orientaziun: Co semuossa gl'avegnir da nos vischinadis
6. Varia

Cordialmein envida
La suprastonza

Clom d'urgenza 118

Preziadas vischinas, preziai vischins

Onn per onn dat ei cass en nies cantun nua ch'ils pumpiers vegnan clamai memia tard sil plaz da seracass. Savens emprovan habitontas e habitonts da cuntonscher pumpiers ch'els enconuschan via telefon privat. Il temps che va aschia a piarder ha ils davos dus onns caschunau la veta a duas persunas el Grischun! Plinavon daventan ils donns cun mintga minuta spiarsa pli gronds.

Perquei s'adrebbein nus a Vus cun ina ferventa supplica: **clamei ils pumpiers mo sur il clom d'urgenza 118**. Era sche Vus veis mo in pign problem sa il polizist che pren encunter Vies telefon reagir aschia che mo ina pintga gruppa d'agid ni singulas persunas vegnan clamadas. Ulteriuras informaziuns era davart la prevenziun anfleis Vus sin nossa pagina www.pumpiers-sursassiala.ch.

Engraziel per Vies sustegn!
Vos pumpiers Sursassiala

**Uniun da dunnas
Preavis**

La radunonza generala ha liug **mardis, ils 15-3-2011**.

La suprastonza

Apparats d'udida

Gliendisdis, ils 24 da schaner 2011 denter las 14.00 e las 16.00 saveis Vus schar schubergiar e regular Vies apparat d'udida en Casa da tgira Sursassiala. Arthur Jacomet fa quei survetsch per tuts interessents gratuitamein.

Liug: Casa da tgira Sursassiala, stiva da schiember.

Cordiala invitaziun
Casa da tgira Sursassiala



Uniun da dunnas Mustér
Mummas cun affons pigns

Nus mein a magliar Fondue/Raclette **mesjamna, ils 26 da schaner 2011** el Quadrel. Annunzias pren Ada Lutz sut tel. 081 947 61 31 bugen encunter entochen ils **20 da schaner 2011**.

Mummas cun affons pigns Mustér

Fuffernadi da mupi per novizs dall'annada 2007 e 2008

Haveis Vus mummas cun Vies affon dall'annada 2007 e 2008 tschaffen da fuffernar in'ura da moviment, legria, zambergiar e cantar en emperneivla cumpignia e cuntentientscha? Lu envidel jeu Vus cordialmein per in'ura da fuffernadi da mupi **gievgia, ils 20 da schaner 2011 dallas 9.30–10.30 el Center da sport, Mustér**.

Bugen prendel encunter las annunzias sut 081 936 43 86 ni 076 516 11 68.

Amicabels salids
La menadra Riccarda Flury-Casanova

Uniun samaritana Mustér
Radunonza generala

La radunonza generala statutarica ha liug: **venderdis, ils 21 da schaner 2011 allas 19.30 el hotel Alpsu**.

Cordialmein envida
La suprastonza

Banca Raiffeisen Cadi
Preavis radunonza generala 2011

La radunonza generala dalla Banca Raiffeisen Cadi ha liug **venderdis, ils 11 da mars 2011 allas 20.00 el center da sport a Mustér**.

Banca Raiffeisen Cadi
cussegl d'admnistraziun

Secziun da catschadurs Péz Alpetta Mustér
Preavis: Radunonza generala

Venderdis, ils 11 da fevrer 2011 allas 20.15 el hotel Sax.

PCD Mustér
Radunonza extraordinaria

Gievgia, ils 20 da schaner 2011 allas 20.15 el hotel La Furca.



Tractandas:

1. Discussiun pertuccont igl avegnir dalla partida locala
2. Elecziun d'ina nova suprastonza
3. Eventuala dissoluziun
4. Varia

La suprastonza

Ludoteca Mustér

Liug/Ort: Halla Cons, tel. 076 494 39 92
e-mail: ludoteca@disentis.ch

Uras d'avertura / Öffnungszeiten:
Gliendisdis/Montag: 18.30–20.00
Gievgia/Donnerstag: 16.00–17.30
Venderdis/Freitag: 18.30–20.00

Biblioteca populara Mustér

Liug: Casa da scola, tel. 081 947 52 90, biblioteca@disentis.ch

Sut www.disentis.ch ni www.bibliotecas-surselva.ch anfleis Vus nies entir catalog bibliotecar.

Per e-mail saveis Vus reservar ina ni pliras medias ed enteifer 5 dis retrer ad emprest ellas en biblioteca populara.

La biblioteca ei aviarta:
Gliendisdis 18.30–20.00 uras
Mardis 13.30–15.00 uras
Gievgia 16.00–17.30 uras
Venderdis 18.30–20.00 uras

Nies motto: Leger . . . tedlar . . . mirar . . . !
Nus selegrein da mintga viseta.

Biblioteca populara Mustér

Biblioteca populara Mustér
Praulas e historias cun Mats, la miur

Eis ti denter 2 e 6 onns? Has ti gust da vegnir cun tia mumma ni cun in'otra persuna d' accumpignament en biblioteca e tedlar praulas ni historias?

Mats, la miur e nus dalla biblioteca raquitein a ti ina praula ord in cudisch da nossa valischa da surprises e quei mintga gada il **secund venderdis** dil meins dallas 14.30 entochen ca. allas 15.30. Nus selegrein zun fetg sin tei ...

Tgisà, forsa anflein nus mintgatun aunc enzatgei auter che mo cudischs en nossa valischa da surprises!

Cun ils pli cars salids e sin seveser tochen gleiti
Mats, la miur ed il team dalla biblioteca populara Mustér